

— مدخل فقه —

— ۰۰:۰۰:۰۰ —

اثر

خامه عبد الستار

عن اعضاء جمعيت المجله

استانبول

معارف نظارت جليله سنك رخصتيله

باب عالی جوارنده ابو السعود جاده سنده (۷۲) نومرولى

محمود بكك مطبعه سنده طبع اولنشد

۱۲۹۹



بِسْمِ اللَّهِ الرَّحْمَنِ الرَّحِيمِ

بدایه جد و ثنا اول امر عدل و حق و حاکم مطلق درگاه اقدس
و بارگاه مقدس الوهیتنه ^{عالیه} جدیر و سزادر که معشر بشری اکمل
مخلوقات اولمق تکریمیه سرافراز و سعادت دارینی متکفل قوانین
الهییه سنه مظهریتله حائز امتیاز بیورمشدر *

و صلوات صلوات متواصلات اول مصدر عیون المذاهب و البصائر
و مفتاح باب الکنز و الجواهر اولان مفخر موجودات علیه اکمل
التحیات افندمزنک روضه مطهره لرینه احق و احراردر که بدایع
احکام شرایعی تبلیغ ایله امت احدیه لرینی مظهر نور الهدایه
و متوج تاج صدر الشریعه بیورمشدر *

و نوال ترضیه متوالیه اول آل و اصحابنه اهدا اولنور که وساطت
نشر و روایتلریله درر غرر احکام اصول و فروعی طرازیده
آخر الزمان بیورمشدر *

بعد ذا فنون متداولیه ممارستی اولان ذوات فضائل سماته خفی
اولمدیغی وجه اوزره علوم مدونه دن هر علمک حسن تعلیم
و تعلمنه مدار اولور و طالبک بصر بصیرتنی آچار بعض

معلومات اولیه اولوب معلومات مذ کوره کتب اسلافده مقدمه
عنوانيله بسط و بیان اولنه کلمش ایسه ده مؤخرأ بعض فنونک
کیفیت تأسیس و تدویننه و تعیین مبادی و مسائله دائر معلومات
اولیه مذ کوره ایروجه جمع و ترتیب اولنه رق مدخل ناميله
رساله لر تألیف اولمق چغری دخی آچیلشدر .

وفن جلیل فقه ایسه بر بحر بی پایان اولدیغندن فن مذ کوره دائر
تألیف اولنان کتب فقهیه دن هربری بر چوق کتابله و اول کتابله
دخی مختلف عنوانلر ایله بر چوق ابواب و فصوله تقسیم اولنه
کیشدر .

شویله که بر جنسدن اولان مسائل بر کتابه جمع اولمغله برابر
بونلردن شروطه دائر اولان مسائل شروط عنوانيله و ارکانه متعلق
اولان مسائل ارکان عنوانيله و سائر مسائل دخی برر نام و عنوان
مخصوص ایله کتب و تحریر اولمشدر .

مسائل متنوعه مذ کوره دن نه کبی احکام فقهیه استفاده اولنه جغی
واحکام مستفاده امر آخرته می یوخسه امر معاشه می متعلقدر . اول
امرده بورالری طالبک اجالا معلومی اولمق ایچون قبل الشروع
انواع مسائل فقهیه وانک اجزاسندن بولنان احکام شرعیه
عملیه بر کوزجله شرح و ایضاح اولنه رق و بوکا فقهک مبادی
و استمدادی و فقهه متعلق ده بعض معلومات اولیه علاوه قلنه رق
مستقل بر رساله جمع و ترتیب اولندیغی حالده فائده دن خالی
اولیه جغی چوقدنبرو وارد خاطر اوله بور ایدیسه ده بو بابده

بضاعة عاجز نيك قلتند وروز مره ظهوره كلان مشاغل
 حيلولتند ناشی اثر مذکور بو آنه قدر حیر حصوله
 کله مامشدر .

بوکره اریکه پیرای خلافت و محی ملک وملت اولان پادشاه
 معارفپرور و شهریار عدالتکستر السلطان ابن السلطان
 الغازی عبدالحمیدخان ثانی افندمز حضر تلرینک تحت حایت فیض
 منقبت همایونلرنده اوله رق مجدداً تأسیس و کشاد بیورلمش اولان
 مکتب حقوقده من غیر لیاقة مجله تدریسنه مأمور یتم اثناسنده
 مجله ایله برابر مدخل فقه تدریسی خصوصی علاوہ مأموریت
 بیورلمش اولدیغندن الامر فوق الادب حکمنجه شو وسیله ایله
 بو آوان (سعد) اقترانده اوله بر رساله نک جمع و تألیفنه
 مباشرت اولنهرق عند تیسر ختاهما (مدخل فقه) اسمیله توسیم
 اولندی .
 وبالله التوفیق و بد از مة التحقیق

اشبو رساله بر مقدمه ایله ایکی باب و بر خاتمه یی شاملدر

مقدمه

اوج مقالیدی حاویدر

﴿ مقاله ١ اولی ﴾

مدخل فقهیک تعریفی حقننده در

(مدخل فقه) علم فقهیه شروعده دخلی اولان شیر دیمک اوله رق
وسائل فقه ایله مبادی فقهیدن عبارتدر که بونلردن هر بری بر
وجه اتی برر بایده بیان اولنده جقدر .

﴿ مقاله ٢ ثانیه ﴾

تدوین فقهه احتیاجی بیان حقننده در

صدر اولده بولنان اصحاب کرام ذوی الاحترام (رضوان الله
تعالی علیهم اجمعین) حضراتی شرف صحبت نبی مفخر الانام (علیه
اکمل التحیات والسلام) برکاتیله احکام فقهیه یی بالذات مشکاة
صدر نبوتدن اخذ و یاخود بالذات صدر سعادتدن اخذ ایدن
اکابر اصحابدن تلقی بیورملر یله اصحاب مشار الیههم تدوین فقهیدن
مستغنی بولندقلری کبی صدر ثانیده بولنان تابعین کرام (رضوان
الله تعالی علیهم اجمعین) حضراتی دخی قرب عهدن و بیلنلرنده

وقوعات واختلافك قلت وندر تندن ونادراً اختلاف وقوعنده
اول عصر معدلتحصرد ه موجود بولنان بقیه کبار اصحاب
فقاہتنصابدن حل مشکلاتک امکانندن ناشی اوائل صدر ثانیده دخی
وضع وتدوین فقہہ احتیاج کورلمیہ رک صدرأ عن صدر تلق
علم شرایع واحکام ایله اکتفا بیوررلر ایدی .

وقتا که دائره جلیله اسلام کسب وسعت ایدرک بین الناس
وقوعات وحوادثک تکرری و بعضاً دخی فتن واختلافک ظهوری
ایله کرکی کبی وضع وتدوین علم شرایع واحکامہ احتیاج
کورلمش اولمغین اولوقت موجود بولنان کبار فقہا وضع وتدوین
علم شرایع واحکامہ مباشرت واولبابده صرف ماحصل قدرت
بیوردیلر .

انبحق مکلف اولان انسانک هر عملی ایچون کندویہ مخصوص
دلیله مستند بر حکم شرعی اولدیغندن ودار تکلیف دائم اولدچہ
وقوعات وحوادثک کثرت وعدم انقطاعندن ناشی جزوی اوله رق
بونلرک احکامی ضبط اولنه میہ جفندن فقہاء کلیت وجه اوزره
حوادث ووقوعاتک احکامی ضبط ایچون موضوعلری مکلفینک
افعالندن وحموللری احکام شرعیہ عملیه دن عبارت بر طاقم قضایای
کلیه وضع وترتیب بیوردرق اسمنه (فقہ) تسمیه ایتدیلر .

مثلا معدومی بیع باطلدر . قضیه سی بر قضیه فقہیه اولوب بونک
موضوعی اولان بیع افعال مکلفیندن بر فعل وحمولی اولان

بطلان احکام شرعیه دن بر حکمدر . و حکم مذکور محملنده مبرهن
بر دلیل شرعی یم مستنددر

ایشته شو قضیه فقہیه ایله هر بایع مکافدن صادر اولان بیع معدومک
حکمی ضبط و بیان اولمشدر . شو قدر وار که قضایای فقہیه نک
کلیتی قواعد منطقیه نک کلیتی کبی دکدر . چونکه قضایای
فقہیه نک ینه قبل شرعدن بیان اولمش بعض مستثنیات و ارد
از جمله ذکر اولنان قضیه دن سلم واستصناع کبی بعض افرادی
استثنا قلمشدر .

فقه ذکر اولنان قضایا و مسائل شرعیه یم اطلاق اولندیغی کبی
قضایای مذکور یم علم و ادرا که دخی اطلاق اولنور .
ته کیم مجله احکام عدلیه نک برنجی ماده سنده فقه بو وجه
اوزره علم و ادراک ایله تعریف اولمشدر .

﴿ مقاله * نالته ﴾

علمك تقسیمی حقنده در

علم ادراکدن عبارت اولوب حقیقه واحد اولدیغی حالده
معلومات متنوعه یم تعلقی حسبیه هر درلو تقسیمی قابلدر . ته کیم
کتب و رسائنده علم جهات مختلفه اعتبار یله اقسام کثیره یم تقسیم
اولمشدر .

انجق تقسيم آتی مقامه اوفق کورلمش اولمغین بورسئالده علمک
اول وجهله تقسیمی اختیار قلنمشدر .

شویله که علم ایکی نوع اولوب بری النہیاته و دیکری شرعیاته
تعلق ایدر . النہیات تعلیم و تدریس ایله معلوم اولدیغی کبی عقل
ایله دخی ادراک اولنه بیلور .

اما شرعیات انجق شارعک بیانیه معلوم اولور . و بوجهته
شرعیاته تعلق ایدن علومک تعلیم و تدریسه احتیاجی ده
زیاده در .

❦ باب اول ❦

وسائل حقنده اولوب اویچ فصلی حاویدر

❦ فصل اول ❦

وسائلی تعیین حقنده در

کرك فقه و كرك فقهك مأخذی اولان كتاب وسنت لسان عذب
البیان عربی اوزره مؤسس بولندیغی جهته بونلك دقایق
و حقایقنه و اصل اولق بهمه حال لسان مذکورى وانك اصول
وقواعدینى مبین اولان فنون عربیه یی تحصیله متوقفدر
و بوجهته علوم عربیه علوم شرعیه یی وسیله و آلتدر

واگرچه علوم شرعیه نك برمقداری لسان اخره نقل و ترجمه

اولنمش ايسه ده بو مقدار ايله (علوم شرعيه) علوم عربيه ده
احتياج دن قورتيله مامشدر .

بناء عليه بر كيمسه علوم شرعيه نك دقايق و حقايقنه و اصل اولمق
ايستر ايسه اول و مسائل قبيلندن اولان فنون ادبيه عربيه يني
تحصيل ايتليدر . و فقط لزومندن زياده ادبياتله اشتغال ايدوب ده
اصل مقصد اقصى اولان شرعياتي تحصيلدن محروم قالمامليدر .

﴿ فصل ثانی ﴾

وسائلك تعريف و تقسيمى حقنده

(علم ادب) بر طاقم امور و مسائل بيلمكدر كه انسان امور و مسائل
مذ كوره يه وقوف و اطلاع ايله لفظ و خط جهتلرندن تراكيب
نريده ده وقوعه كله بيله جك انواع خلل و خطا دن احترازه
مقتدر اولور .

وقتك ابن كمالى جودت پاشانك بوكره موقع انتشاره قونيلان
بلاغت عثمانيه نام كتابنك ديباجه سنده بيان بيورلديغى وجهله
علوم ادبيه عربيه اون ايكي فن اولوب فنون مذ كوره نك سكزى
اصول و دردى فروعدر .

(اصول ثمانية) لغت , صرف , اشتقاق , نحو , معانى , بيان
عروض , قافيه فنلريد .

(فروع اربعه) خط عربى , قرض شعر , انشاء نثر , محاضرات
فنلريد .

﴿ فصل ثالث ﴾

علوم شرعیہ نك فنون مذکورہ یہ جہت تعلق رینی بیان حقندہ در

لسان مذکور اوزرہ مؤسس و موضوع اولان علوم شرعیہ دہ واقع مفردات عربیہ نك جواهر و مواد حروفی اعتبار یلہ معنارینی فہمدہ فن لغتہ . و صورت و ہیئات مطرده سی اعتبار یلہ معنارینی فہمدہ فن صرفہ . و اصالت و فرعیت جہت یلہ یکدیگرہ انتساب رینی فہمدہ فن اشتقاقہ احتیاجز وارد ر .

ہلہ علوم شرعیہ بی تحصیلدہ فن نحوہ اولان احتیاجز جملہ دن اہمد ر . ز یرا معلومدر کہ اعرابك اختلافیلہ ترا کیب عربیہ نك معناری دخی مختلف اولور .

از جملہ (ما احسن زید) ترکیبندہ زید رفع ایلہ قرائت اولندقدہ ترکیب مذکور زید دن حسنك نفینی افادہ ایدر . و نصب ایلہ قرائت اولندقدہ زیدك حسنندن تعجبی افادہ ایدر . و کسر ایلہ قرائت اولندقدہ زیددہ احسن اولان شیئك تعیینندن استفہامی افادہ ایدر . مرویدر کہ بر کیسہ قاضی ابو عبیدك حضورندہ برندن برمال دعوی ایتسی اوزرینہ قاضی مومی الیہ اصول مشروعہ سی وجہلہ مدعی علیہ نہ دیرسك دیومدعینك دعواسندن سؤال ایلسی و مدعی علیہ لامك ضمیمہ (مالہ علی حق) جوابنی و پرسسی اوزرینہ قاضی مومی الیہ تکرار مدعا علیہ سن اعراب بیلور میسك دیوواقع اولان سؤالنہ دخی مدعی علیہ (نعم) جوابنی ویرنجہ حاکم

مومی الیه اولیه ایسه ادعا اولنان مالی مدعی یه و یر دیو مدعا
علیهی الزام بیورمشلردر .

علوم شرعیه نك سائر فنون ادبیه یه دخی برر وجهله تعلقلری
وارددر . انجق بورساله مختصر اولدیغندن بونلرک تفصیلندن صرف
نظر اولندی .

— باب ثانی —

مبادی حقنده اولوب ایکی فصلی حاویدر

﴿ فصل اول ﴾

مبادی شروع حقنده در

بر علمه شروع اول علمی وجه مایله تصور وادرا که و آنی تحصیلده
برفائده اولدیغنی تصدیقه متوقفدر . چونکه شروع اولنه جق
علم وجه مایله تصور اولندیغنی حالده مجهول مطلق دیمک
اوله رق ذهنک اکا توجیهی ممکن اوله مز . و شروع فعل اختیاری
اولدیغندن ولو اجمالا اولسون شروع اولنه جق علمی تحصیلده
برفائده اولدیغنی تصدیقه وابسته در .

فقط بر کیمسه بصیرت وجه اوزره بر علمه شروع مراد ایدر ایسه
قبل الشروع (رؤس ثمانیه) اطلاق اولنان سکز شیئی (یعنی اول
علمک تعریف و اسمنی و واضع و موضوعنی و مسائل و فائده سنی
و سائر علومه نسبتله درجه و شرفنی بیلمسی لازمدر .

ذکر اولنان رؤس ثمانیه اوزرینه بعضیلری علمک استمداد و حکمی
یعنی اول علم ندن مأخوذ اولدیغنی و آنده شارعک حکمی نه
ایدوکنی بیلکی دخی علاوه ایدرک مجموعنه مبادی عشره اطلاق
ایتمشدر .

ابن زکری تحصیل مقاصد نام کتابنده اشبو مبادی عشره بی
بروجه آتی نظم ایتمشدر .

- * فاول الابواب فی المبادی * و تلك عشرة على المراد *
- * الحد والموضوع ثم الواضع * والاسم واستمداد حکم الشارع *
- * تصور المسائل الفضيلة * و نسبة فائدة جليلة *

فقه حنفینک واضعی امام اعظم نعمان ابن ثابت حضر تلیدر .
مانحن فیه اولان علمه کالججه بونک اسمی فقهدر و (فقه) مسائل
شرعیه عملیه بی بیلکدر و مسائل مذکورده بی بیلکدنده مقصد
احکام فقهیه بی بیلکدر .

احکام فقهیه یا امر آخرته تعلق ایدر احکام عباداتدر و عباداتده
مقصد اصلی عبدک ملک معبوده تقربی وجود و ثوابه نیلیدر .
و یا امر دنیا به تعلق ایدر احکام مآلکات و معاملات و عقوباتدر .
و بونلرده مقصد اصلی مصالح عبادک قضاسیدر .

امام مشار الیه واضع فقهدر دنیلسی فقهک اصولی وضع و تنکثیر
و اصول مذکورده اوزرینه فروغنی تفریع و طریق تفریعنی توضیح

ایلدیکی جهتله در . یوقسه اندن اول فقه یوغیده ابتدا امام مشارالیه
حضرتلری وضع ایتدی دیمک دکلدر .

زیرا امام مشارالیه دن اول عبدالله بن مسعود رضی الله عنه
حضرتلری (۱) آیات واحادیثدن فروع فقهی استنباط و حضرت
علقمه آتی تأیید و حضرت ابراهیم النخعی فقهک متشت اولان
فروع وفوائدینی جمع و ترتیب و حضرت حماد فروع و فوائد
مذکورہنک تنقیحی خصوصنده بذل مقدرت بیورمشلدر .

حتی استعاره طریقیله دینلشددر که فقهی عبدالله بن مسعود رضی الله
عنه حضرتلری آگدی و حضرت علقمه آنی سقی ایتدی و حضرت
ابراہیم النخعی بونی بیچدی و حضرت حماد دوس ایلدی (یعنی
اول اکینی دو کدی) و امام اعظم حضرتلری اول حبوباتی اوکتدی
و امام ابو یوسف حضرتلری آنی تعجین ایتدی (یعنی خور یاپدی)
و امام محمد حضرتلری آنی اتمک یاپدی . الیوم ناس بو اتمکدن
بیورلر .

فی الحقیقه اولیله در . چونکه بالاده بیان اولندیغی و جهله امام اعظم
حضرتلری فقهک اصولنی وضع و توفیر و اصول مذکورہ اوزرینه
فروعنی تفریع و طریق تفریعنی توضیح بیوردقدن صکره امام ابو

(۱) مشارالیه اجلاء فقهاء اصحابدندر . و مسروقدن روایت اولندیغنه کورمه اصحابک علی
مشارالیه ایله حضرت علی کرم الله وجهه ده نہایت بولمشدر . حضرت عمر رضی الله عنه مشار
الیهی ذکر آتی نامه ایله اهل کوفه یه قاضی و وزیر نصب بیورمشلدر . (اما بعد فانی قد بعثت
الیکم عمارا امیرا و عبد الله قاضیا و وزیرا و انهما من نجباء اصحاب رسول الله صلی الله علیه و سلم
و من شهد بدرا فاسمعوا لهما و اطیعوا فقد آثرکم بهما علی نفسی) انتهى

یوسف حضرتلری امام مشارالیهک وضع بیورمش اولدقلری
اصولدن فروع فقهک کیفیت استنباطی خصوصاً صنده تدقیق
نظر بیورمشلردر .

امام محمد بونی اتمک یاپدی الیوم ناس انک اتمکنی بیورلر دیمکدن
مراد امام مشارالیه حضرتلری فروع فقهی آخر شیئه احتیاج
مس اتمیه جک مرتبه ده تحریر و تهذیب بیورمش اولدقلرندن ناس
الیوم امام مشارالیهک فروع فقهه دائر جمع و تألیف بیوردقلری
کتابلرندن انتفاع ایدیورلر دیمکدن کنایه در .

امام مشارالیهک فروع فقهه دائر جمع و تألیف بیورمش اولدقلری
کتب معتبره نك اسامیسی خاتمه ده ذکر و بیان اولنه جقدر .

فقهک موضوعی مکلفک فعلیدر .

زیرا بو فنده ندب و اباحه و صحت و فساد کبی مکلفینک اعمال
و افعالنه عارض اولان احوالدن بحث اولنور . و معلومدر که بر
فنده هر نه شیئک احوال و اعراض ذاتیه سندن بحث اولنور ایسه
اول فنک موضوعی او شیئدر .

مکلف عاقل و بالغ اولان کیمسه در . بو صورتده غیر مکلفک مثلاً
مجنونک فعلی فقهک موضوعندن خارج اولمش اولور . بو حالده
مکلف اولمیان بر کیمسه برینک مالنی اتلاف ایلدیکی تقدیرده انک
مالندن تلف اولان شیئک ضمانیه تکلیف غیر مکلفک و لیسنه

اولور . نه کیم برکسنه نك حیوانی برینك مالنی اتلاف ایلسه متلفك
ضمانیه تکلیف حیوان صاحبنه اولور .

فقهك مسائلی موضوعی مكلفك فعلی و محمولی احكام شرعیه دن
بری اولان قضیه لر در .

مثلا کسب کسب حلالدر و ارتشا حرامدر و اقاله بیع جائزدر
و معدومی بیع باطلدر قضیه لری هب مسائل فقهیه دن در .

شوراسی دخی خفی اولیه که مسائل فقهیه بعضا مسئله شکننده
اولیه رق ذکر اولور انجق اهل و اربابی بونی جزوی بر تصرفله مسئله
صورتنه ارجاع ایده یلور .

مثلا (عاقدین بعد العقد رضایله بیعی اقاله ایده یلور لر) دنیلدیکی
حالده بو بر مسئله شرعیه در . فقط طوغریدن طوغرییه مسئله
شکننده ذکر اولنماشدر . چونکه ذکر اولنان جمله ده مسئله نك
موضوعی (یعنی مكلفك فعلی) اولان اقاله موجود ایسه ده بونده
احكام شرعیه عملیه دن بری بولمادیغنی جهتله مسئله صورتنه
ارجاعه محتاجدر . و بوده سهلدر . زیرا شوپله (بعد العقد رضاء طرفین
ایله اقاله بیع صحیحدر) دنیلدیکی حالده ذکر اولنان جمله مسئله
صورتنه ارجاع اولنمش اولور .

فقهك غایتی انسان احكام شرعیه عملیه بیله رك آركا توفیق
حرکتله سعادت دارینه واصل اولمقدر .

فقهك صلاح ظاهره نسبتی تصوف و عقایدك صلاح باطنه نسبتی

کبیدر (یعنی فصل که تصوف و عقاید تهذیب اخلاق و صلاح باطنه خدمتگاری در کار ایه فقہک دخی صلاح ظاهر خدمتی ظاهر در .

(فقه) کلام و تفسیر و حدیث و اصول فقہدن ماعدا علومک
افضلیدر .

نعم ما قبل فی بیان شرف علم الفقہ من النظم الآتی

* اذا ما اعتر ذو علم بعلم * فعلم الفقہ اولی باعتراز *

* و کم طیب یفوح ولا کسک * و کم طیر یطیر ولا کبار *

فقہک مأخذی ادلهٔ اربعه یعنی کتاب و سنت و اجماع و قیاسدر
ادلهٔ مذکورہ نک تفصیل احوالی و بونلر ایله استدلالک شروط
و کیفیتی علم اصول فقہده مبنیدر .

فقہی تحصیلده شارعک حکمی بروجہ آتی بیان اولنور .

شویاہ کہ مکلف اولان کسینہ ایچون کندویہ لازم اولہ جق مقدار
فقہ تحصیل ایتمک فرض عیندر .

آخرہ نفع و یرہ جک قدر فقہ تحصیل ایتمک فرض کفایہ در
و علم فقہده تبحر ایتمک مندوبدر .

﴿ فصل ثانی ﴾

مبادی مسائل فقہ حقندہ در

(مبادی مسائل فقہ) فن فقہده مقصود بالذات اولیوب بلکه

مقصود بالذات اولان مسائل فقهیه کندولره ایتنا قلمغی ایچون
ایراد اولنان شیلردر .

مبادی مذکوره ایکی نوع اولوب بری مبادیء تصویریه و دیگری
مبادیء تصدیقیه در .

مبادیء تصویریه فقهک موضوعنک و انواع موضوعنک تعریفاتی
ایله اصلاحات فقهیهیه دائر ایراد اولنان سائر تعریفلردر .

کشب فقهیهنک حاوی اولدیغی کتابلرک اوائلننده واقع تعریفات
و تقسیمات ایله اصلاحاته متعلق ایراد اولنان سائر تعریفلر هب
مبادیء تصویریه قیلندندر .

(مبادیء تصدیقیه) مسائل فقهیهنک اثباتی ایچون ایراد اولنان
دلیللردر .

مسائل شرعیه عملیهی اثبات مقامنده ادلهء اربعه دن اوله رق
فقهیانک ایراد ایتیش اولدقتری دلیللر هب مبادیء تصدیقیه
قیلندندر .

چونکه مسائل فقهیهی اثباتده ادلهء اربعه نک حجت اولمسی
علم اصول فقهده مرهن اولمغله ادلهء مذکوره دن هر بری
علم فقهه نسبتله اصول موضوعه و مقدمات مسله دندر .

مثلا بر معامله نک جوازینی اثبات مقامنده فقهیانک بو معامله جائزدر

زیرا انك اوزرینه اجماع واقع اولمشدر دهرک واقع اولان
استدلالتاری بوقیادندر .

عرف و تعامل و استحباب کی دلیللر دخی فقهه نسبتله اصول
موضوعه و مبادی تصدیقیه دندر . چونکه علم اصول فقهده
بیان اولندیغی وجهله بوکی دلیللر ادله اربعه دن برینه راجعدر .

﴿ خاتمه ﴾

درت مقاله یی حاویدر

﴿ مقاله ۱ اولی ﴾

احکام فقهیه بیاننده در

خطاب شارع ایله ثابت اولان احکام فقهیه ایکی نوع اولوب
بری تکلیفی و دیگری وضعیدر .

(حکم تکلیفی) اقتضاء یا تخیر ایله افعال مکلفینه متعلق خطاب
شارعک اثریدر .

بالاقتضاء افعال مکلفینه متعلق خطاب شارعدن مراد مکلف به
اولان فعلک مکلفدن صدور یا ترک مقتضی اولان خطابدرکه
امر ونهیک مدلولی دیمکدر .

خطاب مذکور ایله ثابت اولان آثار فرضیت و وجوب و ندب
و کراهت و حرمتدر .

تخیر طریقیله افعال مکلفینه متعلق خطاب شارع مباحاته متعلق
اولان خطابدر که بونده مکلف به اولان فعلک مکلفدن صدور
یا ترکندن هیچ بری مطلوب شارع اولدیغی جهتله مباح
اولان ایشی ایشلیوب ایشلامکده مکلف اولان کیسه مخیردر
و خطاب مذکور ایله ثابت اولان حکم و اثر اباحه در. و اباحه ده حکم
تکلیفی اطلاق تغلبه محمولدر .

(احکام تکلیفیه) بعضاً فعل مکلفک صفتی اولور . و بعضاً فعل
مکلفک اثری اولور .

مثلاً وجوب صلات مفروضه نك و حرمت قتلك صفتی و ملکیت
شرانك و دین اقتراضك ^{borc almar} اثریدر .

افعال مکلفینک صفتی اولان احکام تکلیفیه ده اولاً و بالذات یا
مقاصد دنیویه معتبر اولور و یا خود مقاصد ^{muhtasibler} اخرویه ملحوظ اولور .

مثلاً احکام تکلیفیه دن اوله رق عبادات مفروضه نك صفتی اولان
صحتك مفهومده اولاً و بالذات معتبر اولان جهت ذمتك وجوبدن
بری اولسیدر . و برائت ذمت ایسه مقاصد دنیویه دندر .

کذلک احکام تکلیفیه دن اوله رق صلات مفروضه نك صفتی اولان
وجوبك مفهومده اولاً و بالذات معتبر اولان جهت فعلی
اوزرینه ثوابك و ترکی اوزرینه عقابك ترتیدر که بونلر مقاصد
اخرویه دندر .

(اعتبار اول ایله) فعل مکلف صحیح و باطل و فاسد و منعقد و غیر منعقد و نافذ و غیر نافذ و لازم و غیر لازم قسملرینه تقسیم اولنور .

عباداتده مقاصد دنیویه تفریغ ذمت اولدیغی کبی معاملاتده مقاصد دنیویه اختصاصات شرعیه یعنی عقود و فسوخک اوزرلرینه ترتب ایدن اثرلردر .

مثلاً بیعدن مقصد ملک رقبه و اجاره دن مقصد ملک منفعت و نکاح دن مقصد ملک متعه و طلاق دن مقصد تفریق زوجیت و صحت قضادر مقصد محکوم بهک ثبوتی و صحت شهادت دن مقصد حکمک لزومیدر .

امدی بر فعلک کاینیغی مقصد دنیوییه موصل اولمسنه صحت و او فعله صحیح و بر فعلک ارکان و شرائطنده خلل اوله رق اصلا مقصد دنیوییه موصل اولماسنه بطلان و او فعله باطل و بر فعلک ارکان و شرائطی مقصد دنیوییه ایصالنی مقتضی اولوبده بعض اوصاف خارجییه سی مقصده ایصالنه مانع اولمسنه فساد و او فعله فاسد تسمیه قلنور .

صحت و بطلان و فساد دن ماعدا انعقاد و عدم انعقاد نفاذ و عدم نفاذ لزوم و عدم لزوم کبی معاملاتده راجع دهبا بعض احکام فقهیه واردر . انعقاد تصرفات شرعیه نک اجزاسنک یکدیگره ارتباطلرین و عدم انعقاد عدم ارتباطدن . نفاذ تصرفات شرعیه اوزرینه اثارینک ترتبندن و عدم نفاذ آثاریک عدم ترتبندن . لزوم تصرف

شرعیات تراضی طرفین اولمقسرین رفعی ممکن اولماز حیثیتده
اولمسندن و عدم لزوم رفعی ممکن اولور صورتده بولمسندن عبارتدر.

مثلا بیعك انعقادی رکن بیع اولان ایجاب و قبولك متعلقنده اثری
ظاهر اوله جق وجهله یکدیگره ارتباطندن و عدم انعقادی
ایجاب و قبولك وجه مشروح عدم ارتباطندن و بیعك نفاذی بیع
اوزرینه اثر بیع اولان ملکیتك ترتبندن و عدم نفاذی بیع اوزرینه
ملکیتك عدم ترتبندن و بیعك لزومی خیار اتدن عاری اوله رق بدون
الاقاله رفعی ممکن اولماز صورتده واقع اولمسندن و عدم لزومی
خیار اتدن بری بولنه رق بدون الاقاله رفعی ممکن اولور صورتده
اولمسندن عبارتدر.

والحاصل صحت و بطلان و فساد و انعقاد و نفاذ و لزومده و سائر
بونلره مماثل اولان احکام فقهیه ده مقاصد دنیویه معتبردر . نته کم
و جوب و ندب و اباحه و کراهت و حرمتده مقاصد اخرویه
معتبردر .

(اعتبار ثانی ایله) فعل مکلف عن یمت و رخصت قسملرینه منقسم
اولور . عن یمت اعذاره مبنی اولیه رق ابتداءً مشروع اولان شیدر
و رخصت اعذار مشروعیه بناءً ثانیاً مشروع اولان شیدر .

(حکم وضعی) علی طریق الوضع افعال مکلفینه متعلق خطاب
شارعك اثریدر .

وضع طریقیه افعال مکلفینه متعلق خطاب شارع ایله ثابت
اولان احکام . رکنیت و شرطیت و سببیت و علیت کبی شیردرکه
کتب فقهیده شروط و ارکانه و علل و اسبابه دائر ایراد اولنان
جمله لهب احکام وضعیه بی بیان قیلمنددر .

مثلا علی طریق الوضع قبیل شارعدن (بیعک رکنی ایجاب
و قبولدر . و بیعک انعقادنده رکنی اهلندن صادر اولمق و حکمنی
قابل اولان محله مضاف اولمق شرطدر) دیو واقع اولان خطاب
ایله ثابت اولان آثار . ایجاب و قبولک رکنیتی و بیعک انعقادنده
رکنی اهلندن صادر اولسنک شرطیتیدر .

﴿ مقاله ثانیہ ﴾

حقوقک تقسیمی حقندهدر

حقوق مشروعہ درت نوعدر .

(نوع اول) صرف حقوق اللہدرکه عبادات و عقوبات و کفاراته
منقسمدر . و بنوع حقوق نفعی فردہ مخصوص اولمیوب عمومہ
عائد اولدیغندن شانی توقیر ایچون جناب حقہ نسبت اولنمشدر .

مثلا کعبته الہی محافظہ واکا حرمت ایتک حقوق اللہنددر .
چونکہ عامہ مسلمین بیت شریفی کندولره قبلہ اتخاذ ایتدکلرندن
انک نفعی عمومہ عائد اولدیغندن امر محافظہ سی دخی عمومہ
عائددر .

(نوع ثانی) صرف حقوق عباد در که (انواع معاملات)
حقوقک بنوعنه راجعدر .

(نوع ثالث) کندوده حق الله ايله حق عبد اجتماع ايدرك حق الله
يعنى عقوبت جهتی غالب اولاندر . عقوبت قذف بوقبيلدندر .
(نوع رابع) کندوده حقین اجتماع ايدرك حق عبد جهتی غالب
اولاندر . قصاص بوقبيلدندر .

﴿ مقاله ۳ ثلثه ﴾

طبقات فقهاء پاننده در

محقق ابن کمال پاشا مرحومک بعض رسائلنده بیان اولندیغنه نظراً
فقها یدی طبقه در .

(طبقه اولی) ائمه اربعه (یعنی امام اعظم (۱) و امام مالک (۲)
و امام شافعی (۳) و امام احمد ابن حنبل (۴) رحمهم الله حضراتی)
کبی قواعد اصولی وضع و تأسیس بیورمش اولان ذواتک
طبقه سیدر که طبقه مذکوره اصحابنه مجتهد فی الشرع اطلاق

- (۱) امام مشار الیه ۸۰ سنه هجریه سننده تولد و ۱۵۰ سنه سنده ارتحال دار بقا الیه ۷۰ سنه معبر اولشدر
(۲) امام مشار الیه ۹۰ سنه هجریه سننده تولد و ۱۷۹ سنه سنده ارتحال دار بقا الیه ۸۹ سنه معبر اولشدر
(۳) امام مشار الیه ۱۵۰ سنه هجریه سننده تولد و ۲۰۴ سنه سنده ارتحال دار بقا الیه ۵۴ سنه معبر اولشدر
(۴) امام مشار الیه ۱۶۴ سنه هجریه سننده تولد و ۲۴۱ سنه سنده ارتحال دار بقا الیه ۷۷ سنه معبر اولشدر

اولنور . مشار اليهم قواعد اصولی وضع وتأسيس بيوردقلى
جهتله سائر طبقات اصحابندن ممتازدرلر .

(طبقه ثانيه) امامين ايله (يعنى امام ابو يوسف وامام محمد
حضر تلىله) سائر اصحاب ابى حنيفه نك طبقه سيدر . اصحاب
ابى حنيفه استاذلرينك وضع وتأسيس بيورمش اولديغى قواعدك
مقتضاسى اوزره ادله شرعيه دن احكام شرعيه فرعيه ي استنباط
ايلدكلى جهتله بونلره مجتهد فى المذهب اطلاق اولنور .

اصحاب ابى حنيفه بعض احكام فروعه استاذلرينه مخالف اجتهدده
بولمشلر ايسه ده اصولده استاذلرينه تقليد ايتدكلى جهتله بونلر
امام شافعى حضر تلى كى معارض فى المذهب اولنلردن (يعنى
اصولا و فروعا) حضرت امامه مخالف اجتهدده بولنلنلردن
ممتازدرلر .

(طبقه ثالثه) خصاص و ابى جعفر طحطاوى و ابى الحسن الكرخى
وشمس الائمة الحلوانى وشمس الائمة السرخسى وفخر الدين
قاضيخان كى كندوده صاحب مذهبندن نص بولنميان مسائلده
اجتهد بيورمش اولان ذواتك طبقه سيدر كه بونلره مجتهد فى المسئلة
اطلاق اولنور .

طبقه مذكوره اصحابى كرك اصولده و كرك فروعه صاحب
مذهبلرينه مخالفت ايدهمزلر . فقط انفاً بيان اولنديغى وجهله
صاحب مذهبندن نص اولميان وقوعاتده صاحب مذهبك وضع

و تأسيس بيورمش اولديغي اصول وقواعديك مقتضاسي اوزرد
استنباط احكام ايدرلر .

(طبقه رابعه) مقلدين رازي کي اصحاب تخريجک طبقه سيدر
و بو طبقه اصحابنک اجتهداقتدارلري يوقدر . فقط صاحب
مذهب طرفندن وضع و تأسيس بيورمش اولان اصول و اصول
مذکورهنک مأخذلري بونلرک مضبوطي اولديغندن صاحب
مذهبدن يا خود اصحابنک برندن منقول اولوب ايکي وجهه محتمل
بولنان مجمللري اصول مذکورهيہ نظر و فروعدن نظائرینه قياس
ايلاه تفصيله اقتدارلري واردر . هدايه صاحبنک کذا في تخريج
الرازي قولي بوقيلدندر .

(طبقه خامسه) مقلدين قدوري و هدايه صاحبلري کي اصحاب
ترجيحک طبقه سيدر . و بو طبقه ده بولنان فقهانک شانلري بر مسئله ده
صاحب مذهبدن روايات مختلفه بولنديغي حالده روايات
مذکورهنک بعضيسيني بعض آخراوزرينه ترجيح ايتکدر . هدايه
صاحبنک (هذه اولي رواية ، وهذا ارفق للناس) عباره لري
بوقيلدندر .

(طبقه سادسه) مقلدين متون معتبره اصحابي (يعني کنز و مختار
و وقايه و مجمع صاحبلري) کي اقوال فقهادن اقوي و يا قوي
اولنلريني ضعيف اولنلردن و ظاهر مذهبي روايت نادره دن فرق
و تميزه مقتدر اولنلرک طبقه سيدرکه بونلره اصحاب تميز اطلاق

اولنور . طبقه مذکوره اصحابك شانلری کتابلرنده اقوال مردوده وروایات ضعیفه بی نقل ایتماکدر .

(طبقه سابعه) مقلدیندن قهستانی ودرر ودر مختار صاحبلی کبی بالاده ذکر اولنان شیلردن هیچ برینه مقتدر اولمیانلرک طبقه سیدر . بناء علیه بو طبقه ده بولنان فقهانك شانلری اصحاب ترجیح و تمیزك ترجیح و تمیزلرینه اتباع ایتمکدر . نه کیم بو خصوص رسم مفتی ده دأر تألیف اولنان رساله لرده تفصیل اولمشدر .

شوراسی دخی خفی اولمیه که بو مقاله ده بیان اولنان فقهانك طبقه اولیدن ماعداسی هپ فقهای حنفیه نك طبقاتیدر .

﴿ مقاله رابعه ﴾

طبقات مسائل بیاننده در

کتب حنفیه ده واقع مسائل فقهیه اوچ طبقه در .

(طبقه اولی) مسائل اصولدر که روایات ظاهره ایله اصحاب مذهبدن (یعنی ائمه ثلاثه دن) مروی اولان مسئله لردر . ائمه ثلاثه دن مراد امام اعظم و امام ابو یوسف و امام محمد حضرت تلریدر . و مسائل مذکوره یه ظاهر روایت دخی تسمیه قلنور . و بعضیلری امام زفر و حسن بن زیاد کبی بالذات حضرت امامدن اخذ علوم ایدن اصحاب ابی حنفیه بی دخی ائمه ثلاثه یه الحاق ایتشلر ایسه ده ظاهر روایتده غالب و شایع اولان ائمه ثلاثه نك قولی اولمقدر .

امام محمدك مبسوط وزيادات وجامع صغير وجامع كبير وسير صغير
وسير كبير نامرييله بنام كتابلرنده اولان مسائل هب مسائل
اصولدر .

چونكه كتب ستة مذكوره روايات موثوقه ايله (يعنى شهرت
و تواتر ايله) امام مشار اليهدين مرويدر و بوجهتله كتب
مذكوره به كتب ظاهر الروايات اطلاق اولنور .

و حاكم شهيدك كافى اسمنده اولان كتابى دخی مسائل اصولى
حاوى ونقل مذهبه معتمد بر كتابدر . چونكه حاكم مشار اليه
بونده امام محمدك كتب ستة مذكوره سنده اولان مسائلى جمع
بيور مشلدر . و بونى مشايخ اسلاميه دن چوق ذوات شرح
ايت مشلدر . از جمله امام شمس الاثمة السرخسى حضرتلرينك
مبسوط السرخسى اسمنده كتاب مذكور اوزرينه مفصل بر شرحى
وارد . و شرح مذكور دخی بين الفقهاء غايت معتمد بر كتابدر .

بوندن بشقه حاكم مشار اليهك منتقى نامنده بر كتابى دهها وارد
و بوده كتب مذهبن معدوددر . فقط بونده بعض نوادر مسائلى
موجوددر .

امام محمدن مروى اولان مبسوطك متعدد نسخهلرى اولوب
آنچق بونلردن اظهر اولانى مبسوط ابى سليمان جوز جانيدر
و مبسوطى دخی متأخرين مشايخ اسلاميه دن چوق ذوات
شرح بيور مشلدر . از جمله شيخ الاسلام خواهر زاده نك مبسوط

کبیر اسمنده مفصل بر شرحی و شمس الائمة الحلوانی حضرت تریک
دخی شمس الائمة الحلوانی اسمنده كذلك متصل بر شرحی
وارد .

و بونلرک مبسوطاتی حقیقتده شروح اولوب امام محمدک مبسوطلیله
مختلط اوله رق ذکر اولمشدد .

کتب ستة مذکوردهن سائرلری دخی فقهای متأخرین طرفلندن
شرح بیورلمشدر . و شروح مذکورده الیوم کتبخانه لرمزده
موجوددر . و بوجهتله اسلاف اخلافه پک بیوک اثرلر بر اقمشدر
(رحمهم الله رحمة واسعة)

(طبقة ثانیه) نوادر مسائلیدر که کتب مذکوردهن ماعدا
کتبده اوله رق اصحاب مذهبیدن روایت اولنان مسئلهلردر
امام ابو یوسفدن مروی اولان کتب امالی (۲) ایله حسن ابن زیاد
وسائر اصحاب محرراتک محررلری و مسائل معینهده ابن سماعه
ومعلی ابن منصورک روایتلری کبی روایت واحده ایله اصحاب
مذهبیدن روایت اولنان مسائل هب بوقیلدندر

کذلك امام محمدک کیسانیات وهارونیات وجرجانیات ورقیات
ناملریله بنام کتابلرنده اولان مسائل هب نوادر مسائلیدر .
چونکه کتب مذکوردهنک امام مشار الیهدن روایتی سالف الذکر

(۲) امالی املاک جمعیدر . و املا عادت سلف اولدیغی اوزره استاذک تقریرندن
تلیذلرینک یازدقلری مسائلدر

کتاب سته نك روايتى درجه سته واصل اوله مامشدر . بناء
عليه امام مشار اليهك بوكتابلرينه كتب غير ظاهر الروايه
اطلاق اولنور .

(طبقه ثالثه) . واقعات و نوازل مسائليدر كه اصحاب مذهب بدن
روايت اوليان وقوعاتده متأخرين مجتهدينك اجتهاد ايتد كاري
مسائليدر . واقعات مسائلي اجتهاد ايدن ذوات امامينك (يعنى
امام محمد ايله امام ابو يوسفك) اصحابى واصحاب اصحابيدر .
وهلم جرا

عصام ابن يوسف وابن رستم و محمد ابن سماعه و ابى سليمان
الجرجاني و ابى حفص البخاري حضراتى امامينك اصحاب بندر
و بونلردن صكره واقعات مسائلي اجتهاد ايدن فقها محمد ابن سله
و محمد ابن مقاتل و نصير ابن يحيى و ابى نصر قاسم ابن سلام
حضراتيدر وهلم جرا

فقيه ابى الليث السمرقنديك كتاب نوازلى و ناطفينك مجموع
نوازلى ايله واقعاتى كذلك حاكم شهيدك واقعاتى هب واقعات
مسائلي حاوى كتابلردندر .

قاضى خان و خلاصه صاحبلى كى فقهاء متأخرين كتابلرنده
طبقات ثلثه مسائلي مختلط اوله رق جمع ايتمشلردر و بعضيلرى دخی
طبقات ثلثه مسائلي يكدىكرندن تفريق ايدرك ايراد ايتمشلردر .
شويله كه اولاً مسائل اصولى و ثانياً نواذر مسائلي و ثالثاً

واقعات مسائلنی درج ایتمش لدر . رضی الدین السرخسینک
محیط السرخسی اسمیه سما اولان کتابی بویولده ترتیب اولمشدر
نعم مافعل

- * وكتب ظاهر الرواية انت * ستاً لكل ثابت عنه حوت *
- * صنفها محمد الشيباني * حرر فيها المذهب النعماني *
- * الجامع الصغير والكبير * والسير الكبير والصغير *
- * ثم الزيادات مع المبسوط * تواترت بالسند المضبوط *
- * كذلك مسائل النوادر * استأدها في الكتب غير ظاهر *
- * وبعدها مسائل النوازل * خرجها الاشياخ بالدلائل *

ابن عابدين

﴿ ذيل ﴾

مجله احكام عدليه نك حاوی اولديغی مسائل متون وشرح
و فتاوی دن مأخوذ بولنديغی جهته بونده دخی بالطبع طبقات ثلثه
مسائل موجود ایسه ده مسائل مذ کوره نك اکثر یسی روایت
ظاهره نك نفلیچون موضوع اولان متون معتبره دن اخذ اولمش
اولديغندن مجله مذ کوره نك حاوی بولنديغی مسائلک اکثر یسی
ظاهر روایت مسائلیدر .

مجله احکام عدلیه بی ترکیب و تشکیل ایدن اون التي کتابدن
 هر يك بالاسی (موجبنجه عمل اولنه) خط همایونی ایله موشح
 بولمیشله مجله مذکورہ بالجمله محافل و محاکم دولت علیده
 دستور العملدر .

تمت الرسالة بعون الله تعالى

